

# FUDBALSKI KLUB „ŽELJEZNIČAR“ SARAJEVO

Zvornička br.27., Sarajevo



## STATUT FUDBALSKOG KLUBA „ŽELJEZNIČAR“ SARAJEVO

Sarajevo, mart 2015. godine

## SADRŽAJ

- I Osnovne odredbe
- II Programski ciljevi Kluba
- III Statut Kluba
- IV Naziv, sjedište i područje djelovanja Kluba
- V Pravni status
- VI Boje, zastava, grb, pečat i ostali simboli Kluba
- VII Dan Kluba
- VIII Članstvo u drugim udruženjima
- IX Aktivnosti u okviru rada Kluba
- X Imovina i sredstva Kluba
- XI Članstvo u Klubu
- XII Prava i obaveze članova Kluba
- XIII Prestanak članstva
- XIV Upravljanje u Klubu
- XV Organi Kluba
- XVI Skupština Kluba
- XVII Upravni odbor
- XVIII Direktor Kluba
- XIX Sportski direktor Kluba
- XX Sekretar Kluba
- XXI Nadzorni odbor
- XXII Odbori, komisije i druga radna tijela
- XXIII Odgovornost za rad funkcionera u Klubu i odgovornosti kolektivnih organa
- XXIV Javnost rada Kluba
- XXV Unutrašnja organizacija
- XXVI Pripajanje, razdvajanje, transformacija ili prestanak rada Kluba
- XXVII Ostale odredbe
- XXVIII Prelazne i završne odredbe

U skladu sa članom 18. Zakona o udruženjima i fondacijama („Službene novine FBiH“ broj 45/02) i člana 40. Statuta, Udruženja FK Željezničar Sarajevo, od 27. 12. 2012. godine, na



sjednici održanoj dana 04.03.2015. godine, Skupština Udruženja Fudbalski klub „Željezničar“ Sarajevo donosi:

## STATUT

### Fudbalskog kluba „Željezničar“ Sarajevo

#### I OSNOVNE ODREDBE

##### Član 1.

Fudbalski klub „Željezničar“ (u daljem tekstu: Klub) je dobrovoljna, nevladina, nepolitička i neprofitna sportska organizacija za fudbalski sport, osnovana 4. maja 1921. godine u Sarajevu, u kojem su građani i drugi članovi Kluba, udruženi radi postizanja ciljeva Kluba, unaprjeđivanja fudbalskog sporta na profesionalnoj osnovi, organizovanog bavljenja fudbalom, te usklađivanja ličnih i zajedničkih sa društvenim potrebama, u skladu sa važećim zakonskim propisima i ovim Statutom.

#### II PROGRAMSKI CILJEVI KLUBA

##### Član 2.

Klub ima svojstvo pravnog lica, sa pravima, obavezama i odgovornostima koje ima na osnovu Ustava, zakonskih propisa i Statuta.

Programski ciljevi osnivanja i djelovanja Kluba su da:

- Svojim djelovanjem doprinosi razvoju, afirmaciji, promociji fudbala i širenju bavljenja fudbalom u svim segmentima stanovništva (omasovljenje fudbalskog sporta);
- Promoviše obrazovnu i odgojnu funkciju sporta, fer plej, razumijevanje, toleranciju i odgovornosti kroz bavljenje fudbalom i sportom uopće;
- Postiže vrhunske sportske rezultate i time ispunjava sva očekivanja i zahtjeve članova, navijača i simpatizera Kluba, te promoviše državu Bosnu i Hercegovinu;
- Omogućava aktivno učestvovanje u fudbalskim takmičenjima svim zainteresovanim članovima u svim selekcijama;
- Omogućava usavršavanje članova Kluba, praktično i teoretsko, o fudbalskom sportu;
- Ostvaruje što bolju saradnju sa udruženjima građana ili navijača Kluba;
- Doprinosi stvaranju vrhunskih fudbalera kroz vlastitu omladinsku školu;
- Doprinosi postizanju vrhunskih rezultata kroz učestvovanje amaterskih i profesionalnih selekcija na domaćim, evropskim i drugim takmičenjima;
- Doprinosi stvaranju vrhunskih stručnjaka u oblasti fudbalskog sporta kroz sistem obrazovanja u Klubu;
- Organizuje fudbalske škole i druge oblike bavljenja omladine i odraslih fudbalskim sportom, te uključuje fudbalske stručnjake, psihologe, sociologe, socijalne radnike, pedagoge, zdravstvene radnike i druga stručna lica s ciljem postizanja sveobuhvatnog kako fudbalskog tako i životnog obrazovanja, te stvaranja zdrave sportske ličnosti;

- Stvara pretpostavke za investicionu politiku sa jasnim finansijskim izvorima kroz koju će projektovati, izgraditi i održavati moderan stadion sa pratećim terenima i infrastrukturnim objektima koji su potrebni za razvoj fudbalskog sporta;
- Kontinuirano prati razvoj fudbalskog sporta u zemlji i inostranstvu aktivnim učestvovanjem u stvaranju teoretskih poboljšanja i praktičnih inovacija, te primjene istih u Klubu;
- Osigurava uslove za svestrani razvoj zdrave sportske ličnosti;
- Njeguje i afirmiše pozitivne vrijednosti čovjeka i razvija svijest o njegovoj odgovornosti prema društvenoj zajednici;
- Ostvaruje ostale ciljeve u skladu sa ovim Statutom.

### III STATUT KLUBA

#### Član 3.

Statutom, kao najvišim aktom Kluba, u skladu sa zakonom, uređuju se:

- Naziv i sjedište Kluba;
- Boje Kluba, grb i zastava Kluba;
- Oblik i sadržaj pečata Kluba;
- Područje djelovanja, programski ciljevi i djelatnost Kluba;
- Uslovi i način ućlanjenja u Klub, prestanak ćlanstva u Klubu, kao i prava i obaveze ćlanova Kluba;
- Zastupanje i predstavljanje Kluba;
- Organi Kluba i njihova ovlaštenja;
- Naćin imenovanja u organe Kluba, uslovi i naćin opoziva lica koja su imenovana u organe Kluba, trajanje mandata, naćin odlučivanja u organima Kluba;
- Naćin i ovlaštenja za raspolaganje imovinom Kluba;
- Naćin donošenja finansijskog izvještaja i izvještaja o radu;
- Javnost rada Kluba;
- Postupak donošenja Statuta, izmjena i dopuna Statuta, kao i drugih općih akata Kluba;
- Nadzor nad zakonitošću rada Kluba;
- Uslovi i postupak za pripajanje, razdvajanje, transformaciju ili raspućtanje Kluba;
- Pravila za raspodjelu preostale imovine u slućaju prestanka rada Kluba;
- Osnivanje subjekata za privredne i druge djelatnosti po uslovima utvrđenim zakonom i drugim propisima;
- Druga pitanja od znaćaja za ciljeve i djelatnost Kluba.

### IV NAZIV, SJEDIŠTE I PODRUĆJE DJELOVANJA KLUBA

#### Član 4.

Naziv Kluba je: Fudbalski klub „Ćeljeznićar“ Sarajevo.

Skraćeni naziv Kluba je: FK „Ćeljeznićar“ Sarajevo.

Sjedište Kluba je u Sarajevu, Zvornićka ulica, broj 27.



Naziv i skraćeni naziv se upotrebljavaju u pravnom prometu u obliku u kojem su upisani u nadležni Registar.

## **V PRAVNI STATUS**

### **Član 5.**

Klub je osnovan na neodređeno vrijeme i ima svojstvo pravnog lica, sa pravima, obavezama i odgovornostima koje ima na osnovu Ustava, zakona i Statuta.

U pravnom prometu sa trećim licima Klub istupa u svoje ime i za svoj račun.

Rad Kluba je javan.

## **VI BOJE, ZASTAVA, GRB, PEČAT I OSTALI SIMBOLI KLUBA**

### **Član 6.**

Boje Kluba su plava i bijela.

Zastava Kluba je plave boje, pravougaonog ili trokutastog oblika pri čemu se u sredini zastave nalazi grb (žig) Kluba.

Grb Kluba je u obliku štita. Boje grba su plava i bijela. Osnovni elementi grba su: natpisi „FK Željezničar“, „1921“ i „Sarajevo“, slika fudbalske lopte, kao i amblem željeznice (krila željezničkog točka).

Upravni odbor Kluba je ovlašten za donošenje odluke, kojom se precizno utvrđuju ostali elementi Grba, a po ukazanoj potrebi odlučuje i o redizajnu grba.

Grb Kluba je zaštićen kod nadležne institucije.

Klub ima svoj pečat.

Pečat je okruglog oblika, u kojem je na bosanskom jeziku i latiničnim pismom ispisan naziv Kluba, dok se u sredini pečata nalazi grb Kluba.

Način upotrebe i čuvanja pečata Kluba se uređuje posebnom odlukom koju donosi Upravni odbor.

Klub posjeduje četvrtasti štambilj za prijemni protokol sa ostavljenim prostorom za broj protokola i datum, a kojeg čuva i koristi lice koja je zaduženo za vođenje protokola.

Klub u okviru svog djelovanja može koristiti i druge simbole koji sadrže boje ili grb Kluba, a o njihovoj upotrebi odlučuje Upravni odbor Kluba.

## **VII DAN KLUBA**

## Član 7.

Kao dan i praznik Kluba je određen 19. septembar, odnosno dan kada je 1921. godine, Klub zvanično registrovan u tadašnjem Sarajevskom nogometnom podsavezu.

Dan Kluba se svečano obilježava kroz aktivnosti koje utvrđuje Upravni odbor Kluba.

## VIII ČLANSTVO U DRUGIM UDRUŽENJIMA

### Član 8.

Klub se može udruživati u saveze ili druge oblike udruživanja u oblasti sporta, ako je to od značaja za ostvarivanje ciljeva Kluba, o čemu odluku donosi Upravni odbor Kluba.

Klub je udružen u Sportsko društvo „Željezničar“ Sarajevo.

Odnosi sa ostalim klubovima udruženim u Sportsko društvo „Željezničar“ Sarajevo se uređuju posebnim Sporazumom o udruženju klubova u Sportsko društvo „Željezničar“ Sarajevo, statutom Sportskog društva i drugim aktima.

## IX AKTIVNOSTI U OKVIRU RADA KLUBA

### Član 9.

Klub ciljeve ostvaruje kroz slijedeće aktivnosti:

- Okupljanje što većeg broja građana s ciljem njihovog učlanjivanja u Klub, te organizovanje stalnog obrazovanja i odgojnog rada u skladu sa ciljevima utvrđenim ovim Statutom, a radi aktivnog bavljenja fudbalskim sportom i uključivanja u rad i upravljanje Klubom;
- Saradnju sa organima uprave, građanima, privrednim društvima i drugim pravnim i fizičkim licima, radi okupljanja građana, prvenstveno omladine, i njihovog učlanjenja u Klub;
- Saradnju sa medijima radi obavještavanja javnosti o radu Kluba, sportskim i drugim rezultatima Kluba, kao i ostalim informacijama o Klubu;
- Saradnju sa drugim sportskim organizacijama i njihovim zajednicama, radi usklađivanja zajedničkih interesa i razvijanja međusobnih odnosa;
- Organizovanje fudbalske škole i drugih oblika bavljenja omladine i odraslih fudbalskim sportom, te uključivanje fudbalskih stručnjaka, psihologa, sociologa, socijalnih radnika, pedagoga, zdravstvenih radnika i drugih stručnih lica s ciljem postizanja sveouhvatnog kako fudbalskog tako i životnog obrazovanja, te stvaranja zdrave sportske ličnosti;
- Organizovanje treninga fudbalera i njihovog osposobljavanja za postizanje što boljih sportskih i takmičarskih rezultata;
- Staranje o obrazovanju i stručnom usavršavanju kadrova u saradnji sa odgovarajućim stručnim organizacijama;



- Organizovanje prvenstvenih, kup, prijateljskih i drugih utakmica, domaćih i međunarodnih, a prema raporedu nadležnih fudbalskih organa, dogovoru ili pozivu drugih klubova;
- Učestvovanje na fudbalskim turnirima u zemlji i inostranstvu i na prijateljskim utakmicama po pozivu drugih klubova;
- Obezbeđivanje materijalnih sredstava radi finansiranja djelatnosti Kluba, iz prihoda ostvarenih od organizacije utakmica i turnira, ostvarenih naknada za učestvovanje na utakmicama i turnirima koje organizuju drugi klubovi u zemlji i inostranstvu, naknada od TV prenosa i prava, naknada od reklama i sponzorskih ugovora, prihoda od usluga, igara na sreću i članarina, sredstava od donacija, izdavanjem publikacije vezanih za djelatnost Kluba, prodajom suvenira ili na drugi način obezbijeđenih sredstava u skladu sa zakonom;
- Popularizaciju fudbalskog sporta kroz pokretanje, vođenje i učestvovanje u humanitarnim i dobrotvornim akcijama;
- Druge aktivnosti u skladu sa ovim Statutom i općim aktima Kluba.

#### Član 10.

Radi obezbjeđivanja sredstava neophodnih za ostvarivanje ciljeva Kluba, Klub može osnovati subjekte za privrednu i drugu djelatnost.

Klub može obavljati i nesrodne privredne djelatnosti koje nisu neposredno povezane sa ostvarivanjem osnovnih statutarnih ciljeva, ali samo preko posebno osnovanog pravnog lica.

### X IMOVINA I SREDSTVA KLUBA

#### Član 11.

Radi ostvarivanja ciljeva i provođenja aktivnosti Kluba, Klub stiče sredstva, odnosno određena prava na ta sredstva, te ista koristi pod uslovima i na način utvrđen zakonskim propisima, ovim Statutom ili općim aktom donesenim u skladu sa ovim Statutom.

Pod sredstvima Kluba se podrazumijeva i imovina Kluba, odnosno nekretnine koje su kod nadležnih organa i s odgovarajućom dokumentacijom upisane na ime Kluba.

#### Član 12.

Novčana sredstva za rad Kluba se, između ostalog, ostvaruju:

- Iz prihoda ostvarenih od fudbalskih utakmica;
- Od članarina i drugih oblika davanja članova;
- Od reklama, reklamnih poruka i sponzorskih usluga;
- Od sportske prognoze i igara na sreću;
- Od dobrovoljnih priloga i poklona fizičkih i pravnih lica;
- Od sredstava dodjeljenih iz budžeta;
- Iz prihoda od kamata, dividendi, dobiti od kapitala, zakupnina, honorara i sličnih izvora;

- Iz prihoda ostvarenih prodajom suvenira Kluba;
- Iz prihoda ostvarenih obavljanjem privredne djelatnosti;
- Iz drugih izvora shodno važećim zakonskim propisima.

#### Član 13.

Sredstva Kluba se koriste u skladu s njihovom namjenom i u svrhu ostvarivanja uslova za provođenje aktivnosti i postizanje ciljeva Kluba, i to na način uređen ovim Statutom i drugim općim aktima Kluba.

U upravljanju i korištenju sredstava Kluba, članovi i organi Kluba poduzimaju mjere za ekonomski svrsishodno korištenje sredstava, kao i za sprječavanje i otklanjanje nezakonitosti i drugih negativnih pojava u korištenju i raspolaganju imovinom.

#### Član 14.

Upravni odbor za svaku kalendarsku godinu donosi Plan poslovanja kojim se utvrđuju potrebna sredstva za ostvarivanje ciljeva Kluba, kao i namjena tih sredstava.

Ukoliko se Plan poslovanja ne donese prije početka godine, potrebna sredstva za ostvarivanje ciljeva Kluba se utvrđuju privremenim finansijskim planom, i to za period koji ne može biti duži od tri mjeseca.

Plan se izvršava ostvarivanjem prihoda i njihovim trošenjem u skladu sa zakonom, ovim Statutom i općim aktima Kluba.

Raspodjela prihoda se vrši u skladu sa Planom poslovanja.

#### Član 15.

Po isteku godine se sastavlja završni izvještaj o izvršenju Plana poslovanja, kao i godišnji finansijski izvještaji, i to u rokovima koji su određeni odgovarajućim zakonskim i podzakonskim aktima.

Finansijske izvještaje iz stava 1. ovog člana, a koji su potvrđeni od strane ovlaštenog vanjskog revizora ili certificiranog računovođe, usvaja Skupština Kluba na prijedlog Upravnog odbora.

#### Član 16.

Za potrošnju sredstava u skladu sa zakonom, ovim Statutom i općim aktima Kluba su odgovorni Upravni odbor i direktor Kluba.

Nadzorni odbor Kluba je ovlašten da vrši kontrolu i verifikaciju potrošnje sredstava Kluba, o čemu izvještava Skupštinu Kluba.



## **XI ČLANSTVO U KLUBU**

### **Član 17.**

Članstvo u Klubu se zasniva dobrovoljnim pristupom.

Član Kluba može postati svako fizičko lice koje prihvata ciljeve i Statut Kluba, bez obzira na nacionalnu pripadnost, rasu, pol, uzrast, jezik, vjersko uvjerenje, obrazovanje, imovinsko stanje ili bilo koje drugo lično svojstvo.

Članstvo u Klubu se ne može prenositi niti naslijediti.

Član Kluba može biti i pravno lice na isti način kao i fizička lica.

### **Član 18.**

Klub ima slijedeće kategorije članova:

- Redovne članove (članovi koji plaćaju godišnju članarinu),
- Članove iz reda sponzora, kao i fizičkih i pravnih lica koja doniraju sredstva za ostvarivanje ciljeva Kluba,
- Počasne članove,
- Članove iz reda igrača, trenera i zaposlenih u Klubu.

### **Član 19.**

Redovnim članom Kluba se postaje popunjavanjem pristupnice, uplatom godišnje članarine, upisom u Registar članova i izdavanjem članske karte.

Visinu godišnje članarine iz stava 1. ovog člana utvrđuje Upravni odbor.

### **Član 20.**

Sponzori Kluba, kao i fizička i pravna lica koja doniraju sredstva za ostvarivanje ciljeva Kluba, postaju članovi kluba.

Odluku o dodjeli članstva iz stava 1. ovog člana donosi Upravni odbor, a ista obavezno sadrži odredbe o dužini trajanja članstva.

### **Član 21.**

Klub ima i počasne članove.

Počasni član može postati svako fizičko ili pravno lice koje je zaslužno za podizanje ugleda kluba na osnovu višegodišnjeg rada u klubu i van njega, te razvoju fudbalskog sporta u cjelini kao i lice čije je članstvo u Klubu od posebnog interesa za ostvarivanje ciljeva Kluba.

Svi predsjednici Kluba i predsjednici Skupštine Kluba, nakon isteka mandata na koji su imenovani postaju počasni članovi Kluba.

Zvanje poasnog člana dodjeljuje Upravni odbor Kluba.

Počasnom članu se dodjeljuje članska karta Kluba.

#### **Član 22.**

Fudbaleri, treneri i zaposlenici u Klubu postaju članovi potpisivanjem odgovarajućeg ugovora.

#### **Član 23.**

Upravni odbor Kluba može vršiti periodičnu analizu članova i po svojoj diskrecionoj procjeni odlučiti da se određeni član briše iz Registra članova.

Lice kojem je odbijen zahtjev za članstvo ili je brisano iz Registra članova se može žaliti Skupštini Kluba.

Odluka Skupštine Kluba je konačna.

Upravni odbor Kluba će donijeti opći akt kojim će propisati način i postupak prijema u članstvo, upisa u registar i vođenje registra članova, kao i ostala pitanja vezana za članstvo u Klubu.

## **XII PRAVA I OBAVEZE ČLANOVA KLUBA**

#### **Član 24.**

Članovi Kluba imaju pravo da:

- Biraju i budu birani u organe upravljanja Kluba u skladu sa Statutom;
- Učestvuju u upravljanju Klubom na način utvrđen ovim Statutom i drugim aktima Kluba;
- Aktivno učestvuju u izradi i provođenju politike i općih akata Kluba;
- Učestvuju u drugim aktivnostima Kluba;
- Budu informisani o radu Kluba;
- Pokreću inicijative za razmatranje pojedinih pitanja od interesa za Klub, te da predlažu rješenja tih pitanja Upravnom odboru;
- Daju svoje prijedloge i mišljenja u vezi donošenja odgovarajućih odluka, samostalno ili preko svojih predstavnika u organima Kluba;
- Ostvaruju i druga prava koja proističu iz zakona, ovog Statuta i drugih akata Kluba.



## Član 25.

Članovi Kluba su dužni da:

- Svojim radom i aktivnošću doprinose ostvarivanju ciljeva i zadataka Kluba, te provode politiku i odluke organa Kluba;
- Plaćaju članarinu u skladu sa odredbama ovog Statuta i drugih akata Kluba;
- Svojim ponašanjem doprinose poboljšanju ugleda Kluba;
- Međusobno saraduju i u međusobnim odnosima poštuju sportske i etičke principe;
- Čuvaju sportski duh, ugled i tradiciju Kluba;
- Koriste imovinu i ostala sredstva Kluba u skladu sa njihovom namjenom utvrđenom Statutom i općim aktima Kluba;
- Postupaju u skladu sa pravilima fudbalske igre, te poštuju statut i pravilnike koje su donijeli FIFA, UEFA, N/FSBIH, kao i drugi nadležni savezi kojim Klub pripada.

Pored dužnosti navedenih u stavu 1. ovog člana, članovi izabrani u organe Kluba su dužni da aktivno učestvuju u radu tih organa, te odgovaraju Klubu kao i članovima koji su ih izabrali.

Fudbaleri, treneri i radnici stručnih službi Kluba imaju i druga prava, obaveze i odgovornosti, u skladu sa zakonom, općim aktima Kluba i zaključenim ugovorima.

## XIII PRESTANAK ČLANSTVA

### Član 26.

Članstvo u Klubu prestaje:

- dobrovoljnim istupanjem iz Kluba;
- neplaćanjem članarine u roku dužem od 3 (tri) mjeseca od dana isteka perioda važenja prethodno uplaćene članarine;
- odlukom Upravnog odbora ili isključenjem iz Kluba;
- smrću fizičkog lica ili prestankom postojanja pravnog lica koje je član Kluba.

## XIV UPRAVLJANJE U KLUBU

### Član 27.

Članovi Kluba svoja prava u Klubu ostvaruju kroz biranje i predlaganje delegata u Skupštinu Kluba, zatim utvrđivanje smjernica i stavova za rad izabranih delegata, upoznavanjem sa izvještajima koje su donijeli delegati i organi Kluba, praćenjem rada delegata i organa Kluba, te pozivanjem na odgovornost, kontrolom rada, ali i na druge načine utvrđene ovim Statutom i općim aktima Kluba.

### Član 28.

Radi efikasnijeg ostvarivanja svojih prava na učestvovanje u upravljanju, članovi Kluba se mogu organizovati formiranjem udruženja građana, sekcija članova, fan klubova i sličnih oblika organizovanja, kojima su ciljevi i zadaci usmjereni na podržavanje ciljeva Kluba, razvijanje međusobne saradnje sa Klubom, izražavanjem privrženosti Klubu i sl.

Sekcije članova, fan klubovi, kao i svi drugi neformalni oblici organizacije članova se smatraju organizovanim momentom donošenja odgovarajućeg akta kojim bi se konstituisali organi ili lica koji će predstavljati sekciju ili drugi oblik organizacije.

Članovi Kluba koji se organizuju na način definisan u ovom članu Statuta su dužni dostaviti obavještenje, kao i akt kojim informišu Klub o načinu organizacije.

## **XV ORGANI KLUBA**

### **Član 29.**

Organi Kluba u skladu sa ovim Statutom su:

- Skupština,
- Upravni odbor,
- Nadzorni odbor,
- Direktor,
- Sportski direktor i,
- Sekretar Kluba.

## **XVI SKUPŠTINA KLUBA**

### **Član 30.**

Skupština Kluba je najviši organ upravljanja u Klubu.

Skupštinu Kluba čine 54 (pedesetčetiri) delegata.

Mandat delegata u Skupštini Kluba traje 4 (četiri) godine.

Isto lice može biti više puta uzastopno birano za delegata u Skupštini.

### **Član 31.**

Svi članovi Kluba imaju pravo da biraju i budu birani za delegate u Skupštinu Kluba.

Izbor delegata u Skupštinu, provodi Komisija za izbor delegata, koju čine Predsjednik i Podpredsjednik Skupštine Kluba, Predsjednik Upravnog odbora, te dva delegata iz postojećeg saziva Skupštine.

Komisija za izbor delegata ima sekretara Komisije.

Izbori se provode najkasnije 30 dana prije isteka mandata postojeće Skupštine.



Komisija za izbor delegata će javno pozvati sve članove Kluba da se lično prijave ili predlože svoje delegate u Skupštinu Kluba.

Komisija organizuje izbor delegata na način da se obezbjedi učešće delegata svih kategorija članova Kluba u Skupštini Kluba, uvažavajući slijedeće minimalne uslove:

- da imaju preko 18 godina,
- da imaju svojstvo člana Kluba u skladu sa ovim Statutom,
- da su članovi Kluba koji svojim radom, doprinosom, iskustvom ili na drugi način mogu doprinijeti ostvarenju ciljeva i unaprjeđenju razvoja i poslovanja Kluba,
- da nisu pravosnažno osuđivani za krivična djela.

Nakon provedenih izbora, Komisija sačinjava zapisnik sa izvještajem o izboru delegata u Skupštinu Kluba.

Originalni primjerci zapisnika se dostavljaju Upravnom odboru i Skupštini Kluba, nakon čega se saziva konstituirajuća sjednica novog saziva Skupštine Kluba.

Ukoliko u toku trajanja mandata Skupštine Kluba, neko od njenih članova izgubi to svojstvo iz razloga predviđenim ovim Statutom, Skupština Kluba je ovlaštena da izabere zamjenskog delegata.

Novoizabrani zamjenski član Skupštine Kluba, bira se na vrijeme do isteka mandata postojećeg saziva Skupštine Kluba.

### Član 32.

Delegati u Skupštini Kluba imaju pravo i obavezu da:

- Učestvuju u odlučivanju na sjednicama Skupštine i u radu drugih organa i tijela u koje budu izabrani;
- Predlažu razmatranje pojedinih pitanja od značaja za rad Kluba;
- Budu informisani o radu organa Kluba;
- Obavještavaju o svom radu i radu organa Kluba kategoriju članova koji su ih izabrali ili delegirali;
- Redovno prisustvuju sjednicama Skupštine, kao i sastancima u okviru organa Kluba;
- Svojim angažmanom maksimalno doprinose ostvarivanju ciljeva Kluba, te ostvaruju prava utvrđena ovim Statutom i općim aktima Kluba.

### Član 33.

Delegatu u Skupštini Kluba mandat prestaje:

- Istekom vremena na koje je imenovan;
- Ostavkom;
- Razrješenjem;
- Ukoliko delegat izgubi status člana Kluba, odnosno ne plaća godišnju članarinu;
- Smrću;
- Zabranom obavljanja funkcija u oblasti sporta, koja je izrečena od strane nadležnog državnog organa ili drugog organa u skladu sa zakonom.

Ostavku na članstvo u Skupštini Kluba podnosi se Predsjedniku Skupštine Kluba.

Predsjednik Skupštine Kluba konstatuje ispunjenost uslova za prestanak članstva u Skupštini Kluba usljed smrti ili ostavke.

Razrješenje člana Skupštine Kluba može predložiti svaki član Kluba uz navođenje obrazloženja za razrješenje.

Delegati u Skupštini Kluba će biti razrješeni ukoliko u toku svog mandata neopravdano ne prisustvuju na dvije sjednice Skupštine Kluba.

Evidenciju o prisustvu delegata na Skupštini Kluba vodi Predsjednik Skupštine Kluba, i po ispunjenosti uslova iz stava 5. ovog člana predlaže razrješenje delegata.

O razrješenju delegata odlučuje Skupština Kluba.

U slučaju prestanka mandata iz razloga definisanih ovim članom, Skupština Kluba je ovlaštena da izabere zamjenskog delegata.

#### Član 34.

Skupština Kluba:

- Donosi statut, izmjene i dopune statuta, te druge akte određene statutom;
- Daje saglasnost za pravne radnje poduzete u postupku osnivanja Udruženja;
- Daje saglasnost na Pravilnik o unutrašnjoj organizaciji i sistematizaciji poslova u Klubu;
- Bira i opoziva Predsjednika i članove Upravnog odbora;
- Usvaja izvještaje koje su pripremili Upravni odbor ili lice ovlašteno za zastupanje i predstavljanje;
- Odlučuje o udruživanju u saveze, pripajanju, razdvajanju, transformaciji, prestanku rada i drugim statusnim promjenama Udruženja;
- Odlučuje o prodaji nekretnina bez obzira na njihovu vrijednost;
- Odlučuje o davanju u zakup ili bilo kakvom drugom raspolaganju imovinom u vrijednosti većoj od 30% od ukupne vrijednosti imovine Kluba;
- Utvrđuje i provodi politiku Kluba;
- Na prijedlog Upravnog odbora odlučuje o svim pitanjima koja se odnose na donošenje odluka vezanim za aktivnosti projektovanja, izgradnje, održavanja i upravljanja modernim stadionom sa pratećim terenima i infrastrukturnim objektima koji su potrebni za razvoj fudbalskog sporta;
- Bira predsjednika i potpredsjednika Skupštine Kluba;
- Razmatra i usvaja Izvještaj o radu Upravnog odbora;
- Razmatra i usvaja finansijski plan, kao i finansijske izvještaje Kluba za prethodni period u rokovima koji su određeni zakonskim i podzakonskim aktima;
- Formira stalna ili privremena radna tijela (odbore, komisije i sl.) za vršenje određenih aktivnosti, a čiji djelokrug i sastav se određuju odlukom o formiranju;
- Bira i imenuje članove Nadzornog odbora Kluba;
- Razmatra i usvaja izvještaje Nadzornog odbora Kluba;
- Odlučuje o svim pitanjima koja nisu u nadležnosti nekog drugog organa Kluba.



## Član 35.

Skupština ima predsjednika i potpredsjednika.

**Predsjednik Skupštine:**

- Saziva sjednice Skupštine;
- Predlaže dnevni red;
- Predsjedava sjednicama Skupštine;
- Vodi računa o praćenju i izvršavanju smjernica, stavova i zaključaka Skupštine;
- Imenuje vršioca dužnosti predsjednika Upravnog odbora u slučaju odsutnosti, spriječenosti ili neopozive ostavke, ali maksimalno na šest mjeseci;
- Vodi evidenciju o prisustvu delegata na sjednicama Skupštine, i u slučaju neprisustva predlaže Skupštini razrješenje delegata.

Predsjednik Skupštine je dužan najmanje jednom godišnje, sazvati Skupštinu Kluba, a po potrebi i češće na zahtjev:

- Upravnog odbora Kluba, ili
- Minimalno 15 delegata u Skupštini.

Potpredsjednik Skupštine pomaže u radu Predsjedniku Skupštine Kluba i vrši poslove koje mu predsjednik povjeri, te ga mijenja u njegovoj odsutnosti sa svim pravima i obavezama.

Mandat predsjednika i potpredsjednika Skupštine je 4 (četiri) godine.

Isto lice može više puta biti izabrano za predsjednika i/ili potpredsjednika Skupštine.

## Član 36.

Skupština se može održati i donositi punopravne odluke ako na sjednici prisustvuje polovina delegata.

Skupština odluke donosi prostom većinom glasova prisutnih delegata, osim u situaciji kada se odlučuje o usvajanju ili promjeni Statuta, prodaji nekretnina bez obzira na njihovu vrijednost, raspolaganju imovinom u iznosu većem od 30% od ukupne vrijednosti imovine, promjeni statusa i prestanku Kluba, kada je za donošenje odluke potrebna dvotrećinska većina svih delegata u Skupštini.

Glasanje je javno osim ako Skupština drugačije ne odluči.

## XVII UPRAVNI ODBOR

### Član 37.

Upravni odbor Kluba ima obaveze i ovlaštenja da:

- Usvaja opće akte Klub za koje je ovlašten ovim Statutom;
- Vodi računa o izvršavanju odluka i politika Skupštine, odluka i drugih akata koje donosi Skupština, te da daje mišljenja i priprema materijale za sjednice Skupštine;

- Priprema i predlaže nacрте i izmjene Statuta, kao i drugih akata koje donosi Skupština Kluba;
- Skupštini Kluba predlaže donošenje odluka vezanih za aktivnosti projektovanja, izgradnje, održavanja i upravljanja modernim stadionom sa pratećim terenima i infrastrukturnim objektima koji su potrebni za razvoj fudbalskog sporta;
- Upravlja imovinom Kluba u skladu s ovim Statutom i općim aktima Kluba;
- Odlučuje o kreditnom zaduženju;
- Predlaže Skupštini Kluba donošenje odluka o prodaji nekretnina, bez obzira na njihovu vrijednost;
- Odlučuje o davanju u zakup ili bilo kakvom drugom raspolaganju imovinom čija je vrijednosti manja od 30% od ukupne vrijednosti imovine Kluba;
- Podnosi Skupštini godišnji izvještaj o poslovanju Kluba, izvještaj o radu Upravnog odbora i Plan poslovanja za narednu godinu;
- Vršі izmjenu namjene i iznosa sredstava za pojedine namjene u okviru ukupnih sredstava predviđenih finansijskim planom;
- Odlučuje o korištenju sredstava rezerve predviđenih finansijskim planom;
- Odobrava izdavanje besplatnih ulaznica i propusnica;
- Odlučuje o visini članarine;
- Vršі analizu članstva i vođenju Registra članstva i donosi odluke o dodjeljivanju počasnog članstva, kao i odluke o brisanju iz članstva;
- Određuje cijene ulaznica za fudbalske i druge priredbe, kao i visinu naknada za usluge koje vrši Klub;
- Odlučuje o izboru direktora, sportskog direktora i sekretara Kluba;
- Odlučuje o organizovanju vansportskih aktivnosti u skladu sa ciljevima i zadacima Kluba;
- Određuje broj profesionalnih fudbalera u skladu sa programom razvoja Kluba;
- Odlučuje o zaključivanju i raskidu ugovora sa fudbalerima, o prijemu fudbalera u Klub i izdavanju ispisnica;
- Odlučuje o zaključivanju ugovora sa trenerima i drugim stručnim sportskim radnicima, odnosno o njihovom prijemu u Klub radi profesionalnog obavljanja stručnih sportskih poslova u Klubu;
- Odlučuje o organizovanju utakmica i turnira, kao i o učešću Kluba na utakmicama i turnirima;
- Odlučuje o dodjeli stipendija, plaćanju školarina, kupovini literature i drugim troškovima vezanim za školovanje fudbalera ili stručnih sportskih radnika;
- Razmatra izvještaje i prijedloge komisija i drugih radnih tijela u Klubu te o njima daje mišljenja Skupštini;
- Odlučuje o redizajnu grba Kluba;
- Odlučuje o davanju novčanih nagrada za izuzetno zalaganje i ostvarene rezultate u skladu sa finansijskim planom, a koje nisu u nadležnosti Uprave Kluba;
- Odlučuje o službenim putovanjima u inostranstvo;
- Utvrđuje aktivnosti obilježavanja dana Kluba;
- Formira stalna ili privremena radna tijela (odbore, komisije i sl.) za vršenje određenih poslova, a čiji djelokrug i sastav se određuje Odlukom o formiranju;
- Vršі druge poslove koje mu u zadatak stavi Skupština Kluba u skladu sa ovim Statutom i općim aktima Kluba.

### Član 38.

Upravni odbor Kluba se sastoji od predsjednika Upravnog odbora i 20 članova.



Prema trećim stranama ispred Kluba i Upravnog odbora istupa predsjednik Upravnog odbora.

Predsjednika Upravnog odbora imenuje i razrješava Skupština Kluba, dok ostale članove Upravnog odbora Skupština imenuje i razrješava na prijedlog predsjednika Upravnog odbora.

Upravni odbor Kluba ima i potpredsjednika kojeg na prijedlog predsjednika bira Upravni odbor iz svojih redova.

Potpredsjednik Upravnog odbora pomaže u radu predsjedniku Upravnog odbora i vrši poslove koje mu predsjednik povjeri, te ga mijenja u njegovoj odsutnosti sa svim pravima i obavezama.

#### Član 39.

Mandat članova Upravnog odbora, predsjednika i potpredsjednika Upravnog odbora traje 4 (četiri) godine.

Isto lice može više puta uzastopno biti izabrano za predsjednika, potpredsjednika ili člana Upravnog odbora.

Članovima Upravnog odbora za njihov rad ne pripada nikakva novčana naknada, osim u slučaju profesionalnog angažovanja sa punim radnim vremenom, u kojem slučaju se takvi odnosi regulišu odgovarajućim ugovorom.

#### Član 40.

Sjednice Upravnog odbora se održavaju najmanje jednom mjesečno, a po potrebi i češće.

Sjednicu saziva i njome rukovodi predsjednik Upravnog odbora.

Sjednici Upravnog odbora je dužan prisustvovati, te u njenom radu učestvovati i Direktor Kluba.

Po potrebi, sjednici Upravnog odbora mogu prisustvovati i imenovani delegati članova Kluba iz Skupštine Kluba.

Upravni odbor može punovažno donositi odluke ako sjednici prisustvuje više od polovine njegovih članova.

Odluke se donose većinom glasova prisutnih članova Upravnog odbora, i to javnim glasanjem, ukoliko se ne utvrdi drugačiji način glasanja.

Predsjednik Upravnog odbora ima ovlaštenje da smijeni člana Upravnog odbora ukoliko isti, neopravdano, više od tri puta propusti prisustvovati sjednicama, o čemu je dužan obavjestiti predsjednika Skupštine Kluba.

Potvrđivanje smjene takvog člana Upravnog odbora vrši Skupština Kluba na prvoj narednoj sjednici.

#### Član 41.

Upravni odbor za svoj rad i donošenje odluka odgovara Skupštini Kluba.

### XVIII DIREKTOR KLUBA

#### Član 42.

Direktor Kluba je inokosni poslovodni organ.

Direktor Kluba organizuje poslove Kluba i rukovodi radom službi, a u skladu s ovlaštenjima koja su mu data ovim Statutom, Pravilnikom o unutrašnjoj organizaciji i sistematizaciji i općima aktima Kluba, zaključcima Skupštine i Upravnog odbora.

U izvršavanju svojih zadataka, Direktor Kluba:

- U skladu sa ovim Statutom, zastupa i predstavlja Klub u zemlji i inostranstvu;
- Odgovara za zakonitost rada Kluba;
- Odgovara za finansijsko poslovanje Kluba;
- Osigurava uslove za jedinstveno funkcionisanje službi u cilju efikasnog vršenja poslova Kluba;
- Organizuje i usklađuje rad pojedinih organizacionih jedinica u Klubu radi blagovremenog izvršavanja poslova i zadataka;
- Donosi odluke i preuzima mjere u vezi sa pravima i obavezama zaposlenika Kluba;
- Organizuje, usmjerava i vrši nadzor nad operativnim zadacima zaposlenika;
- Osigurava izvršavanje i pravilno provođenje općih akata, odluka, smjernica i zaključaka;
- Upozorava nadležne organe Kluba na zakonitost akata i poduzima mjere da se obustavi izvršenje eventualnih nezakonitih odluka;
- Ostvaruje saradnju sa članovima Kluba, udruženjima i sekcijama članova;
- Predlaže Upravnom odboru donošenje općih akata i drugih akata Kluba;
- Brine se o urednom vođenju propisanih evidencija i poslovnih knjiga, kao i zapisnika sa sjednica organa Kluba;
- Zaključuje i prati realizaciju ugovora sa trećim stranama, uz odobrenje Upravnog odbora;
- Vršiti i druge poslove u skladu sa zadacima i uputama Skupštine Kluba.

#### Član 43.

Direktora Kluba imenuje Upravni Odbor na prijedlog predsjednika Upravnog odbora.

Za svoj rad Direktor Kluba odgovara Upravnom odboru Kluba.

Mandat Direktora je četiri (4) godine.

Direktor Kluba može biti razriješen i prije isteka mandata, i to posebnom odlukom Upravnog odbora, u slučaju neuspješnog obavljanja funkcije i neispunjavanja zadataka utvrđenih ovim Statutom i općim aktima Kluba.



Po isteku perioda na koji je imenovan, direktor Kluba može ponovo biti imenovan na tu dužnost.

Direktoru Kluba pripada naknada na ime plaće koju određuje Upravni odbor Kluba, a u skladu sa osnovama i principima utvrđenim zakonskim propisima i općim aktima Kluba.

#### Član 44.

Upravni odbor u slučaju odsutnosti ili spriječenosti za rad Direktora Kluba, može imenovati lice koje će ga mijenjati u obavljanju zadataka, s tim da to lice mora biti član Upravnog odbora Kluba.

### XIX SPORTSKI DIREKTOR

#### Član 45.

Sportski direktor upravlja sportskim dijelom poslova koji se odnose na organizaciju i rad prvog fudbalskog tima, kao i omladinske škole fudbala.

Sportskog direktora na prijedlog predsjednika Upravnog odbora imenuje Upravni Odbor Kluba.

Sportski direktor za svoj rad odgovara Upravnom odboru.

Mandat Sportskog direktora je četiri (4) godine.

Sportski direktor može biti razriješen i prije isteka mandata, posebnom odlukom Upravnog odbora, u slučaju neuspješnog obavljanja funkcije i neispunjavanja zadataka utvrđenih ovim Statutom i općim aktima Kluba.

Po isteku perioda na koji je imenovan, Sportski direktor može ponovo biti imenovan na tu dužnost.

Sportskom direktoru pripada naknada na ime plaće koju određuje Upravni odbor Kluba, a u skladu sa osnovama i principima utvrđenim zakonskim propisima i općim aktima Kluba.

#### Član 46.

U izvršavanju svojih zadataka, Sportski direktor:

- Organizuje i upravlja sportskim dijelom poslova Kluba koji se odnose na organizaciju i rad prvog fudbalskog tima, kao i omladinske škole fudbala;
- Odgovoran je za sportski dio funkcionisanja Kluba, u skladu sa svojim ovlaštenjima;
- Izvještava Upravni odbor o stručnom radu i rezultatima svih selekcija Kluba;
- Predlaže i daje smjernice za budući razvoj fudbalskog tima, kao i omladinske škole fudbala;
- Ima ovlaštenja da predlaže Upravnom odboru zaključivanje i raskidanje ugovora sa profesionalnim fudbalerima;

- Zaključuje stipendijske i amaterske ugovore sa fudbalerima amaterima;
- Izdaje ispisnice;
- Predlaže Upravnom odboru zaključivanje ugovora sa trenerima i drugim stručnim sportskim radnicima, odnosno njihov prijem u Klub, a radi profesionalnog obavljanja stručnih sportskih poslova u Klubu;
- Odlučuje o organizovanju priprema prvog fudbalskog tima;
- Odlučuje o organizovanju pripremnih utakmica, kao i o učešću Kluba na turnirima;
- Ostvaruje kontakte i saradnju sa drugim Klubovima i drugim licima, a u cilju angažovanja kvalitetnih fudbalera za fudbalski tim;
- U svim svojim aktivnostima saraduje sa šefom stručnog štaba sa kojim zajednički donosi odluke u dijelu rada timova;
- Realizuje stručne programe i planove rada za trenere i druge stručne sportske radnike u Klubu;
- Vršiti sve ostale poslove koji su vezani za sportske aktivnosti Kluba.

#### **Član 47.**

Upravni odbor u slučaju odsutnosti ili spriječenosti za rad Sportskog direktora može imenovati lice koje će ga mijenjati.

### **XX SEKRETAR KLUBA**

#### **Član 48.**

Ukoliko se ukaže potreba, Klub može imati i Sekretara kojeg, posebnom odlukom, imenuje Upravni odbor.

Odlukom Upravnog odbora se utvrđuju prava, odgovornosti i zadaci Sekretara Kluba.

### **XXI NADZORNI ODBOR**

#### **Član 49.**

Klub ima Nadzorni odbor.

Nadzorni odbor se sastoji od 3 (tri) člana, od kojih jedan ima funkciju predsjednika Nadzornog odbora.

Sjednice Nadzornog odbora saziva i vodi predsjednik.

Mandat članova Nadzornog odbora traje, 4 (četiri) godine, a isto lice može više puta biti imenovano na tu dužnost.

Članove Nadzornog odbora imenuje i razrješava Skupština Kluba.



Članovima Nadzornog odbora za njihov rad ne pripada nikakva novčana naknada, osim u slučaju profesionalnog angažmana sa punim radnim vremenom, u kojem slučaju se takvi odnosi regulišu odgovarajućim ugovorom.

#### Član 50.

Nadzorni odbor ima prava i obaveze da:

- Prati sistem upravljanja u Klubu i ukazuje na eventualne propuste;
- Razmatra i prati finansijske izvještaje Kluba, uključujući i praćenje prihoda i rashoda Kluba;
- Skupštini Kluba dostavlja na razmatranje Izvještaje o radu Nadzornog odbora;
- Prati provođenje zakona i podzakonskih akata u Klubu;
- Kontroliše zakonitost i svrsishodnost trošenja sredstava Kluba;
- Prati i kontroliše racionalnost u upotrebi opreme i sredstava kojima Klub raspolaže;
- Pokreće inicijative i daje prijedloge nadležnim državnim organima radi otklanjanja povrede prava, otklanjanja nepravilnosti u raspolaganju sredstvima Kluba;
- Predlaže nadležnim organima Kluba pokretanje disciplinskog postupka protiv odgovornih lica u Klubu;
- Podnosi prijave nadležnim pravosudnim organima protiv počinitelaca krivičnih djela i prekršaja u okviru rada u Klubu;
- Provođi sve ostale aktivnosti koje kao funkcija nadzora poslovanja Kluba mogu doprinijeti unaprjeđenju poslovanja Kluba, te postizanja ciljeva Kluba.

#### Član 51.

Nadzorni odbor je samostalan u svom radu.

Organi Kluba, radna tijela i službe, kao i zaposlenici Kluba su dužni da po zahtjevu Nadzornog odbora omogućе uvid u sve akte, dokumenta, materijale, te da pruže sve podatke i informacije neophodne za vršenje prava i obaveza iz člana 50. ovog Statuta.

## XXII ODBORI, KOMISIJE I DRUGA RADNA TIJELA

#### Član 52.

Radi izvršavanja određenih zadataka iz okvira djelatnosti Kluba, te radi praćenja i provođenja politike Kluba, kao i postizanja ciljeva Kluba i unaprjeđenja cjelokupnog rada Kluba, u Klubu se po potrebi mogu imenovati komisije, stručni timovi, odbori i druga radna tijela, stalnog ili privremenog karaktera.

Članove tijela iz stava 1. ovog člana imenuju Upravni odbor i Skupština Kluba.

## **XXIII ODGOVORNOST ZA RAD FUNKCIONERA U KLUBU I ODGOVORNOSTI KOLEKTIVNIH ORGANA**

### **Član 53.**

Svaki izabrani ili imenovani nosilac funkcije u Klubu, lično je odgovoran za njeno vršenje, te može biti opozvan ili razriješen s te funkcije i prije isteka mandata, uz obrazloženje razloga opoziva ili razrješenja.

Svaki izabrani ili imenovani nosilac funkcije u Klubu ima pravo da podnese ostavku uz obrazloženje u kojem se navode razlozi iz kojih se ona podnosi.

### **Član 54.**

Izabrani ili imenovani nosilac funkcije, organi Kluba, komisije, stručni timovi, odbori, kao i druga radna tijela ostvaruju svoja prava i dužnosti na osnovu ovog Statuta i općih akata Kluba, i za to su odgovorni članovima Kluba, odnosno organima koji su ih izabrali.

Prilikom opoziva ili razrješenja kolektivnih organa ili tijela, pitanja odgovornosti svakog člana tih tijela se posebno ocjenjuje, i pojedini članovi u zavisnosti od svojih rezultata rada i načina obavljanja funkcije mogu biti ponovo birani u isti ili drugi organ Kluba.

### **Član 55.**

U slučaju neodgovornog obavljanja svojih poslova i zadataka, u skladu sa ovim Statutom i općim aktima Kluba, izabranim nosiocima funkcija u Klubu se mogu izreći mjere:

- Javna opomena,
- Opoziv ili razrješenje s funkcije,
- Isključenje iz kluba.

Općim aktom Kluba se utvrđuju uslovi, povreda dužnosti, odgovornosti, postupak i organi za izricanje mjera.

## **XXIV JAVNOST RADA KLUBA**

### **Član 56.**

Rad Kluba je javan, u skladu sa zakonom i ovim Statutom.

Organi kluba su dužni obavještavati javnost o svom radu, a naročito da poduzimaju potrebne mjere za potpuno, objektivno i blagovremeno informisanje članova Kluba o radu Kluba.

Javnost rada Kluba se obezbjeđuje i kroz blagovremeno informisanje predstavnika medija o radu Kluba.

Klub može imati svoj bilten, u skladu sa odlukom Upravnog odbora.

Klub ima Internet stranicu, a može imati i druge slične oblike online prisustva u javnosti.



Obavještanje javnosti o radu Kluba se vrši putem konferencija za medije, zvaničnih saopštenja, kao i preko zvanične internet stranice Kluba o čijem uređivanju se stara Direktor kluba.

Organi Kluba odlučuju o eventualnom prisustvu novinara i drugih lica svojim sjednicama.

Stavove Kluba, odnosno njegovih organa mogu iznositi i zastupati samo ovlašteni funkcioneri Kluba.

#### **Član 57.**

Službenu tajnu Kluba može predstavljati svaki dokument, podatak i informacija o Klubu i o radu Kluba čije bi saopštavanje moglo ugroziti ili otežati ostvarivanje programa i planova, ciljeva i zadataka Kluba ili čije neovlašćeno iznošenje trećim licima može Klubu nanijeti bilo kakvu direktnu ili indirektnu štetu.

Ocjenu o stepenu tajnosti podataka i utvrđivanju službene tajne daju predsjednik Upravnog odbora i Predsjednik Skupštine, odgovarajućim pismenim određivanjem koji se podaci i informacije smatraju službenom tajnom, i to prije distribucije takvog materijala.

Dužnost svih članova Kluba, organa Kluba i zaposlenika Kluba je da čuvaju službenu tajnu Kluba, čak i po prestanku radnog odnosa ili članstva u Klubu.

### **XXV UNUTRAŠNJA ORGANIZACIJA**

#### **Član 58.**

Pravilnikom o unutrašnjoj organizaciji i sistematizaciji poslova u Klubu se određuju naziv i opis poslova i radnih zadataka, broj izvršilaca, uslovi za obavljanje poslova i radnih zadataka u pogledu radnog iskustva i stručne spreme, kao i ostali elementi od značaja za unutrašnju organizaciju Kluba.

Pravilnik o unutrašnjoj organizaciji i sistematizaciji poslova donosi Upravni odbor.

#### **Član 59.**

Fudbaleri, treneri i radnici stručnih službi Kluba, su lično odgovorni za savjesno izvršavanje radnih zadataka i obaveza.

Fudbaleri, treneri i radnici stručnih službi u slučaju povrede discipline ili neodgovornog izvršavanja radnih zadataka odgovaraju Klubu disciplinski i materijalno.

#### **Član 60.**

Općim aktom Kluba, koji donosi Upravni odbor, se uređuju pitanja disciplinske odgovornosti, kao i mjere predviđene za slučajeve povrede discipline ili neodgovorno izvršavanje radnih zadataka fudbalera, trenera i radnika stručnih službi Kluba.

## **XXVI PRIPAJANJE, RAZDVAJANJE, TRANSFORMACIJA ILI PRESTANAK RADA KLUBA**

### **Član 61.**

Klub može vršiti statusne promjene, te se pripojiti, razdvojiti ili transformisati u drugo udruženje, fondaciju ili neki drugi organizacioni oblik djelovanja u skladu sa zakonskim propisima.

Odluku o statusnim promjenama Kluba iz prethodnog stava donosi Skupština Kluba, a na prijedlog Upravnog odbora Kluba.

### **Član 62.**

Klub prestaje sa radom:

- Odlukom Skupštine Kluba o prestanku rada ili odlukom o pripajanju, razdvajanju ili transformaciji Kluba;
- Ako se broj članova Kluba smanji ispod broja potrebnog za osnivanje Kluba;
- Ako je Klubu zabranjen rad iz drugih razloga utvrđenih Zakonom;
- Ako se utvrdi da je Klub prestao sa radom u skladu sa Zakonom.

Prestanak rada Kluba se potvrđuje kod nadležnog organa za registraciju Kluba.

### **Član 63.**

U slučaju prestanka rada Kluba, sva njegova imovina, prava i obaveze se raspoređuju shodno odluci Skupštine, u pravilu drugom udruženju ili fondaciji registrovanom u Federaciji Bosne i Hercegovine koje obavlja istu ili sličnu djelatnost.

Ukoliko Skupština Kluba ne donese odluku iz stava 1. ovog člana, nadležno ministarstvo će donijeti odluku o raspodjeli imovine drugom udruženju ili fondaciji koji su registrovani u Federaciji Bosne i Hercegovine i koja obavljaju istu ili sličnu djelatnost.

## **XXVII OSTALE ODREDBE**

### **Član 64.**

Opći akti Kluba su Statut, pravilnici i odluke kojima se na širi način uređuju određena pitanja.

Opći akti moraju biti u skladu sa važećim zakonima i Statutom Kluba.



Originalni primjerci općih akata se čuvaju u arhivi Kluba.

Svaki član i svaki organ Kluba može dati inicijativu za donošenje, odnosno izmjene i dopune određenog općeg akta Kluba.

## XXVIII PRELAZNE I ZAVRŠNE ODREDBE

### Član 65.

Klub je dužan usvojiti neophodne i uskladiti postojeće akte sa važećim pravnim propisima i Statutom u roku od 90 (devedeset) dana od dana stupanja na snagu ovog Statuta.

### Član 66.

Komisija za izbor delegata će najkasnije do 15.12.2015.godine, provesti proceduru izbora i odrediti delegate koji će činiti Skupštinu Kluba u skladu sa ovim Statutom.

### Član 67.

Stupanjem na snagu ovog Statuta prestaje važiti Statut Kluba usvojen 27.12.2012. godine.

### Član 68.

Ovaj Statut stupa na snagu danom usvajanja.

U Sarajevu, 04.03.2015.  
Broj: 118/2015



**PREDSJEDNIK SKUPŠTINE**

**Bakir Dautbašić**

**OVJERAVA FEDERALNO MINISTARSTVO PRAVDE**

**Broj: 04-05-2-1075/99**

**Sarajevo, 26.03.2015. godine**

**MINISTAR**

**Zoran Mikulić**

